

253

meritum Patrem Cœlestem ita movit, ut decreverit salutem & beatitudinem æternam nobis conferre. Talis meritoria causa fuit David, qui intuitu ac recordatione meritorum Jonathani filio ejus Mephibosetho benefaciebat, licet Jonathani merita non adessent, & extarent physicè, morali tamen ratione & in memoriam revocata Davidem ad beneficia Mephibosetho exhibenda impulerunt. Altera Causa, quæ Physicum agens movet ad agendum per modum satisfactionis, nuncupatur *Satisfactoria*. Sic Satisfactio Christi immolati seu agni occisi Patrem Cœlestem movit, ex gratia, ob *λύτρον* satisfactorium Filii sui Unigeniti salutem & delicias sempiternas nobis donare. Sic Uxor bonis velut hypotheca quadam Judici satisfacit, ut captivum maritum delictorem, ingenti pecuniaria multa aut pœna capitali plectendum è carcere dimittat, ubi satisfactio non physice causat liberationem hujus delinquentis, moraliter tamen movet Judicem ad concedendam libertatem hæctenus incarcerato. Tertia Causa, quæ à Physico agente aliquid impetrat, vocatur *Impetratoria*, & hoc vel petendo vel aliud aliquod faciendo: Sic vir gravissimus & in honore constitutus, precibus suis movet judicem, ut captivo pedicis constricto condonet delicta, & sic intercessione hujus viri liber dimittitur, Libertatis itaque Causa Impetratoria Moralis est vir iste spectabilis. Hi itaque potissimi sunt Causæ Moralis Modi, quos hæctenus investigavimus, non equidem diffitemur alias adhuc reperiri species, quæ tamen non sunt adeo communes, propterea ex Judicio B. Slevogtii jugi lectione observari debent. Interim hæc unicum adhuc monemus quod isti modi, qui in disticho allato continentur, præ aliis ad restitutionem & reluendum id, quod ablatum est nos obstringant, non ita stricte posteriores, propterea lubet Verbis Thomæ huncce Paragraphum claudere qui *qv. 27. art. 7.* ita differit. *Sciendum est, quod dicti modi in versibus specificati semper obligant ad restitutionem. Primo Jussio, quia ille, qui jubet est principaliter movens: unde ipse principaliter tenetur ad restitutionem: Secundo Consensus in eo, sine quo rapina fieri non potest. Tertio recursus, qui scilicet aliquis est receptor latronum, & iis patrocinium prestat.*